

PUKKE!
vir al u kleurbaadjies
**Johan Claassen
Broers**
(Edms.) Bpk.
Tel. 3612,
POTCHEFSTROOM.
Kerkstraat 92.
Tak: Tomstraat 100.

die WAPAD

Amptelike studentekoerant van die P.U. vir C.H.O.

In U lig sien ons die lig.

JAARGANG XXIX

VRYDAG, 26 APRIL 1974

Nr. 85

**CACHET
APTEEK**

Groot genoeg om u te bedien.

Klein genoeg om u te ken.

★

**DIE
STUDENTE-APTEEK**

PUKKE ONDERSKEI HULLE OP KUESTA '74

BEHALWE dat Salomé Jacobz as mejuffrou Kuesta op Kuesta, wat vanjaar op die kampus van die Universiteit van die Oranje Vrystaat aangebied is, gekies is, was die twee belangrikste gebeurtenisse by die Valskerm-sprong-kursus twee meisies gewees waaronder Annemarie Malan die Puk verteenwoordig het.

Die kursus wat van 8 tot 11 April geduur het, is deur sowat 300 studente bygewoon. Daar is altesaam nege kursusse aangebied by dié instelling van die ASB, waar studente van alle Afrikaanse kampusse mekaar by leersame kursusse en sosiale funksies leer ken het.

KURSUSSE:

'n Seiljagkursus is in samewerking met die Departement van Sport en Ontspanning by die Rusfontein dam aangebied. Sportliefhebbers is in die afrigtings- en skeidsregterskursus onderrig in 'n kursus wat aangebied is.

'n Regskursus met die geregtelike hoofstad van die Republiek van Suid-Afrika in die agtergrond, is onder die leiding van Andre Burger, voorsitter van die Regsvereniging van die U.O.V.S., aangebied sodat kenners sowel as nuwelinge op die gebied die regte regsagtergrond ontvang het. Die kursus is met 'n besoek aan die Landdroshof, Mosiehof en Appèlhof afgesluit.

'n Valskermkursus, uitsluitlik vir beginners onder die leiding van die Valskermklub, is in Bloemfontein, is met sukses aangebied. Die kursus se welslae is in die praktiese sy van die kursus gesien toe die kursustogers spronge vanuit 'n lugmaghelikopter gemaak het.

'n Volledige kursus in die joernalistiek en publikasies in samewerking met ASPU is aangebied. Redaksielede van die Volksblad en prof. D. A. S. Herbst, wat tans professor in die vak Kommunikasiekunde aan die UOVS is, het vir die lesings gesorg. 'n Lesing deur

Ian Trail oor fotografie was ook by die kursus ingesluit en die kursustogers het ook 'n besoek aan die Nasionale Pers gebring.

Die volledige kursus wat in Skrynwerk en Sweiswerk aangebied is, is swak bygewoon omdat 'n paar van die ingeskrewe hulle eerder op die kuns van kaartspel toegespits het sodat daar oorgenoeg geriewe vir die wat getrou die kursus bygewoon het, was.

Die studente wat die kursus in Openbare Redevoering bygewoon het, beweer dat hulle nou sonder 'n minderwaardigheidskompleks sal kan optree. Die kursus — Bak en brou vir huis en skou — is ook met entoesiasme deur 'n aantal dames aangepak en hulle is van mening dat hulle nou met nuwe moed aan hulle toekomstige huisie dink.

Die dames wat nog sukkel om aandag te kry, het 'n kursus vir die Kampus Juffrou bygewoon, waar hulle wenke omtrent hulle voorkoms en maniere ontvang het.

Aan die Fiesta sy van die saak is daar die nodige aandag deur die B.O.K. gegee in 'n baie bedrywige sosiale program.

Maandagaand het die studente, elke universiteit afsonderlik, gekenmerk deur sy akademiese drag na die Odeion opgetrek vir die amptelike opening van die byeenkoms. By die geleentheid het al die Kuestane saamgesing en Willie Nigrini van NKP is op dieselfde aand as die burge-meester van Kuesta gekies. Die aand is op 'n hoë noot met 'n sokkiejol afgesluit, nadat die Pukke van hulle kleurbaadjies ontslae geraak het.

Dinsdagmiddag was daar geleentheid om Bloemfontein te verken aan die hand van 'n kaart wat saam met ander besonderhede in 'n leer verskaf is deur SANLAM.

Die amateur KADRA-toneel geselskap het die aand gesorg vir 'n hofdrama — Die Aand van Sestien Januarie — deur Ayn Rand en op 'n baie oulike manier, is die gehoor ingesluit toe 'n juwe uit die Kuestane saamgestel is om beslissing te gee of die beskuldigde skuldig of onskuldig is. Die aand is weer met 'n Sokkie afgesluit.

Woensdagmiddag is vir die tradisionele rugbywedstryde tussen die Noorde en die Suid afgesonder. Die Puk-dames het hulle kragte by die Noorde ingegooi, maar die Suid het vir die oorwinning gesorg. Die mans-spanne het ook in die stof gebyt, maar Inter-ete op Pelliespark het gesorg dat almal gou weer in een groep

★Vervolg op bladsy 3



Salomé Jacobs (derde van regs) saam met die ander finaliste in die Mej. Kuesta-wedstryd.

VYF GOUE MEDALJES

NA die pasafgelope Suid-Afrikaanse Atletiekkampioenskappe is daar 'n hele paar Pukke wat kan breëbors rondloop as gevolg van hulle skitterende prestasies.

Piet Meyer wat weer eens 'n verkeerde meneer was in die stapnommers, het sommer letterlik vir sy teenstanders hakke gewys deur twee goue medaljes om sy nek te hang. Dit was vir beide die 5000

meter en 20 km stapitems. Laasgenoemde item het hy in 'n pragtyd van 1 uur 36 min. 2 sek. gewen. Dit is die beste tyd ooit, oor dié afstand in Suid-Afrika.

Dawie Malan het bewys dat

hy nou die beste en bestendigste paalspringer in die land is. Hy het nie alleen die paalspring gewen nie, maar ook 'n verrassende tweede plek in die driesprong behaal.

In die gewigstoot vir dames het Marié van der Westhuizen 'n goue medalje verower. Sy het ook 'n derde plek in die skyfwerp behaal.

Deon Troskie het 'n eerste plek, en dus 'n goue medalje in die hoogspring vir mans behaal. Tydens die S.A. Junior Kampioenskappe moes hy tevrede mees met 'n tweede plek. In die verspring vir mans het Stephané Kotzé tweede geëindig na Dawid Langley van Noord-Transvaal.

Ruanda Jacobs kan in 'n verdienstelike tyd van 11,7 sek. oor die 100 meter vir dames slegs 'n tweede plek behaal.

In die 4 x 100 meter aflos vir vroue, het die Wes-Transvaalse span, wat uit vier Pukke bestaan, 'n derde plek losgeslaan. Die span was R. Jacobs, Ria van den Berg, Cathy Hough en Hester Gunter.

Die ander atlete wat plekke behaal het, maar nie 'n medalje kon kry nie, is Hester Gunter in die 400 meter vir vroue, Ria van den Berg in die 100 en 200 meter hekkies en Jorina Genter in die verspring.

Tydens die S.A. Junior Atletiekkampioenskappe kon die Pukke nie juis hond haaraf maak nie. Die volgende plekke is egter behaal:

Skyfwerp Seuns o/19: Henk du Toit — derde.

1500 meter Seuns o/19: H. Seastad — vierde.

1500 meter hindernis o/19: G. Doorward — tweede.

Spiesgooi Seuns o/19: P. Tereblanche — derde.

Gewigstoot Seuns o/19: H. du Toit — eerste.

Hoogspring Seuns o/19: D. Troskie — tweede.

Uitdaging aan Dames!



Rene van Wezel, primaria van Vergeet-my-nie, op dié koshuis se trapkar. Vergeet-my-nie is die enigste dameskoshuis met 'n trapkar en daag ander dameskoshuis uit om hulle voorbeeld te volg.

AANDAG

AANDAG alle personeel en studente.

Dit gebeur vanjaar dat ons gedurende die tweede kwartaal drie Vrydae het waarop daar geen klasse sal wees nie naamlik:

10 Mei — Karnaval;

24 Mei — Hemelvaart;

31 Mei — Republiekdag.

As gevolg hiervan is besluit dat op Dinsdag, 28 Mei, 'n Vrydagrooster gevolg sal word, dit wil sê dat alle klasse op Dinsdag volgens die rooster van Vrydag sal wees.

**Die Bult
Aptek / Pharmacy**
Noordbrug Aptek (Edms.) Bpk.

★ VIR AL U APTEKERBENODIGDHEDE . . .
... ONS KEN U BEHOEFTE

Direkteur: Prof. M. C. B. v. R. v. Oudshoorn (L.A.V.)
Voorsitter: Dr. A. P. Goossens (L.A.V.); A. C. Dreyer
(B.Sc.-Far.) (L.A.V.) en Andries G. Coetsee (B.Sc.-Far.)
L.A.V. (Besturend).



OM MEISIE TE WEES

EK is 'n meisie en dis heerlik.

Die woord impliseer soveel lekkerste lekker dinge: jy kan die een dag denim dra en oor Viëtnam gesels, en die volgende dag fyn pienk voile, en stil wees, want jy is immers een groot geheim; jy kan lekker naby HOM verby skuur, sodat hy kan ruik jy ruik soos appelbloeiels en somer en net partykeer nog soos 'n baba-

tjie; jy kan jou hare lank, lank laat groei en dit blink en los dra, om die geel son en wind-met-die-lang-vingers se ontwil, of dit kort laat knip, sodat almal die ronde blink ringetjies in jou ore kan sien.

Jy kan wees net soos jy wil, en omdat jy 'n meisie is, kan jy nog goed wees vir hom ook, en sag, as sy dae verlep het, en treurig is soos leep-oog kappertjies.

'n Meisie kan nou wel nie wegry vir die wind op 'n geel resiesfiets met afsakhandvatsels nie, of in bruin bome klim om hoog bó naby aan die hemel te wees, of alleen in die veld te wees, of alleen in die veld te loop met die Here en die gras as geselskap, of fluit-fluit hande-in-die-broeksak loop nie. Sy kan nie trapssutjies aanhou of 'n molslang in haar hangkas nie, ook nie sagtebas druiwe nie, maar wat weet...

Maar wat weet mans nou weer van die groot lekkerkry as iemand 'n deur vir jou oopmaak, of die plesier van die

fyn-fyn onderklere en kant sakdoekies.

'n Meisie het soveel toekomsverwagtinge: Daar is die ideale man eendag, en dan die vervulling van haar vrouwees: Moederskap. Ek wil 'n man hê wat lief sal wees vir my, omdat liefde elke meisie, omdat sy meisie is, se begeerte is. Hy moet vir my psalms lees in die môre, en narsings pluk in die aand, en verstaan van Beethoven se vyfde simfonie en alleenwees in die herfs. En hy moet vir my kinders gee — dogters, wat as hulle klein is, bruin kiewietbeentjies sal hê, en dromerig sal wees as hulle groot is en met my sal gesels, saans om 'n kaggel, nog lank nadat die mans bed toe is.

Die Here het 'n vrou uit 'n ribbebeen gemaak en ekweet 'n meisie uit 'n aandeloom, omdat sy die simbool is van alle skoonheid, reinheid en blankheid. Daarom wil ek elke dag juig en sing en bid, oor dié voorreg om meisie te wees. E.R.

Tone krap

JA-NEE dames, 'n modeparade word toe mos vir julle beplan. Word glad gereël dat mannekyne as modelle sou optree. Vir die wat wil trou, sal trourokke vertoon word. Dit alles sou plaasvind in die Totiusaal, Maandag 22 April.

Omdat almal swat, hou die parade net 45 minute aan, om almal die geleentheid te gee om dit by te bring.

Ja, gelukkig daag die Puk-

Emansipasie

JULLE almal ken die cliché: „Agter elke suksesvolle man sit 'n goeie vrou.”

Sou jy onder 'n „goeie” vrou die volgende verstaan: 'n vrou wat haar man kan bystaan op alle terreine van die lewe: die politiek, sosiale en kerklike lewe, sowel as op die sport terrein en as 'n nagedagte, iets weet van die huis en van kinderopvoeding?

Dames, van kleins af word ons geleer om aan alles deel te neem, sosiaal aangepas te wees en met die manlike geslag op alle terreine te kompeteer. Ons moet die beste presteer op akademiese gebied, die redenaarsbeker voor hul neus wegraap en op sportgebied is ons hulle ook nie ver agter nie.

Op universiteit word die emansipasiegedagte omtrent daagliks onder ons aandag gebring. „Kom ons ruk in ons massas op en wys die mans waar Dawid wortels begrawe het”. Sorg dat daar dames op die S.R. kom sodat hulle kan help om die sake op universitêre front te reël.

Goed en wel ons is die meerderheid, maar moet ons nie juis daarom 'n bietjie terugstaan dat ons plek eerder deur 'n man gevul kan word nie, in plaas van om altyd op die voorgrond te wil druk? Het ons dan vergeet dat ons krag in ons vroulike swaakheid lê?

Ons kla heeldag dat die mans nie meer murg in hulle pype het nie, dat hulle hare te lank en hul klere te verfynd is. Kan die oplossing nie hierin gesoek word dat die seun hom met sy moeder identifiseer as gevolg van die feit dat sy so sterk as leidende figuur optree nie!

Dus dames, pas op dat daar nie agter elke verfynde man 'n ge-emansipeerde vrou sit nie.

asters, (julle wat almal kla julle het niks om by te bring nie) in julle hordes op. Die voorste vyf rye van die Totiusaal was almal tot in die helfte gevul. 'n Pragtige beeld van die betrokkenheid van die Puk-aster. Gelukkig dat die persone wat opgetree het, nie spesiaal van Klerksdorp af gekom het nie. Julle het 'n fantastiese voorbeeld gestel en die Puk-manne is trots op julle. Sies, dan is dit julle wat graag 'n dame op die S.R. wil hê. Manne ek vra julle, hoe dink julle gaan die Puk-asters dit regkry?

TIPIES

6.30 nm. „Sannie Pieterse, Sannie Pieterse, voordeur!” Met ten minste twee ure se voorbereiding agter die rug, 'n nuwe rok en blouende gessig, stap Sannie die gang af. Ons held tref ons aan, besig om met 'n verveelde uitdrukking deur die boodskappe van ander mense te blaai. Na 'n rukkie verskyn sy om die deur met 'n afgewagte glimlaggie, maar verdwyn egter blitsvinnig by die aanblik van die horde mans in die voorportaal. Intussen het ons held hom gemaklik agter 'n groot plant tuis gemaak en wegkruipertjie-speel is Sannie se voorland.

Eureka, na tien minute word Meneer gevind! By die deur uit, sien ons haar oor die modder na die motor aangly, met arms wat kort-kort merkwaardige swaai-bewegings bo haar kop uitvoer (in 'n poging om haar balans te behou). Om met die paadjie langs te stap, sou ten minste tien ekstra treë beteken het en ons moet weet, hy is 'n besige man. Terwyl sy die laaste paar treë aangegly kom, staan hy haar reeds en inwag. Soos ons tog sekerlik verwag het, hou hy ewe galant die deur vir haar oop en net betyds ruk sy haar voet in om dit sodoende van vergruising te vrywaar.

Nou waarom is sy vanaand weer so omgekrap?



Nuus aster

VINNIG het ek Marleen Lombard se kamer binne geskarrel en amper net so gou weer daaruit gevlug, aangesien Marleen besig was om haar U.O.D.-frustrasies met die tennistraket reg te sien. Tog het ek genoeg inligting aangaande haar tennisspeelbaan ingewin.

Op 7-jaar het sy die tennistraket vasgevat en dit blykbaar meer op voornemende kerele uitprobeer as op die baan self.

Op hoërskool was dit 'n ander storie, want sy was so aangespoor deur haar afrigter, Kenny Smith, dat sy dag en nag net wou tennis speel. Wat die inspirasie was, bly 'n ope vraag!

In 1969, 1970 en 1971 het sy as Oos-Transvaalse junior gespeel en was ook die Oos-Transvaal skolekampioen. In 1972, 1973 en 1974 speel sy wedstryde vir Wes-Transvaal teen ander provinsiale streekspanne.

Sy ontvang haar Puk-erkeure in 1973. Haar groot ideaal is om Springbokkeure te verwerf. Sy moet dan ook nog net 2 uit die 6 wedstryde

speel om vir haar Wes-Transvaalkleure te kwalifiseer.

Aan die begin van 1974 speel sy een van haar veeleisendste wedstryde. Hierdie wedstryd teen Annemarie Slabbert, wat self vir Noord-Transvaal speel, het twee en 'n halfuur geduur. Sy behaal dan ook die pook oorwinning van 6-8, 6-1, 9-7. En o ja, Marleen het dit sterk op my hart gedruk dat sy 'n Oosterhoffer is.

Hierdie lang aanloop was om te sê dat Marleen nou die Puk se nommer een tennisspeelster is.

Marleen het 'n besonder aantreklike styl en kragtige afslane, waarby sy ook 'n intellektuele speelster is wat al haar houe beredeneerd slaan. Sy beweer egter dat haar oorwinning aan die nuwe Hunga-skoene toegeskryf kan word.

JY 'N BANGMENS?

AAN jou juffrou „bang-om-weer-seer-te-kry”, omdat jy in jou kamer sit, terwyl dit alweer herfs is buite.

Het jy al daaraan gedink dat die wêreld vir jou 'n aaklige plek is, nie omdat die wêreld sleg is nie, maar omdat jy nie jouself in die wêreld kan vind nie?

As jy gedink het dat almal jou bewonder omdat jy alleen kan voortbestaan, wil ek vir

jou sê dat ons vir jou jammer is, omdat jy van jouself 'n leë mens maak — 'n mens vir wie die wêreld 'n hartelose, aaklige plek is en daaronder ook 'n mens wat veeleisend is in enige verhouding.

Wil jy nie probeer om liever elke situasie wat hom voordoen, vir jouself sinvol te maak en algaande leer om jouself in die wêreld te vind, sodat jou oë kan oopgaan vir ander mense wat meer aandag as jy nodig het?

As die lente nie eers vir jou groen was nie, hoe sal jy ooit kan ervaar dat die bruin van die herfsblaar vinniger is as die groen van die lente?

Dis alleen uit die winter se witheid, uit die herfs se ryk bruin en uit die somer se volheid, dat ons in staat is om te waak oor die lente se broosheid en kwesbaarheid!

Kom uit jou kamer uit en leer om jouself te vind in die wêreld, want jy het reeds 'n agterstand, omdat jy te bang was om weer seer te kry!

Liefde is..



„'n somer -net blom van jou kamermaat.”

Bly wees

EK wil bly wees vandag.

Kaalvoet wil ek huppel met die wind deur my hare, om my ore, en die koue wat soel op my bene kom lê. Ek wil my arms wyd oopgooi, my kop agteroor, om al die mooi van die dag raak te vat.

Ek wil bly wees vandag — my hande wil al die mooi blomme in die parkie gaan afpluk en dit in 'n groot beker op my tafel gaan sit. Ek wil die trappe twee-twee opspring en weer vinnig met die trapreling afgly. Ek wil my kamer van hoek tot kant regpak en skoonmaak, ek wil al my akademie vir die volgende week somer vandag al klaar maak.

Berge kan ek versit vandag, so groot wil my blydskap wees.

Ek wil twee pienk melkskommels op die Bult gaan leegdrink en die skuim teen die rand hard met my strooitjie opsuig. Dan wil ek op my hardste 'n lekkerliedjie sing sodat almal vir my moet kyk en saam begin sing.

Ja, ek wil bly wees vandag — 'n groot, borrelende bly. So bly dat die wêreld rondomtalie al om my.

So groot wil my blydskap wees, want... want ek het vandag sy brief gekry!



SKRIKKELFEES GESLAAGD



Dit was 'n ware fees... (Foto: Fotokuns.)

WAT 'N FEES? Wat 'n groot fees was dit nie? 'n Fees wat oorspronklik skrikkerig begin is, maar mense, die grootste sukses ooit! Ja, 'n ieder en 'n elk wat dit bybring het, of moontlik kon by bring gesels nog steeds.



... En Annatjie se pannekoek ook. (Foto: Fotokuns.)

PUKKE ONDERSKEI HULLE...

* Vervolg van bladsy 1
verenig is. Almal het in 'n kring gestaan en sing sodat die trots om 'n Afrikanerstudent te wees in ieder een se hart ontwaak het.
Die aand is 'n Sokkiejol, met musiek deur 'n orkes verskaf, deur die Kuestane geniet.
Donderdag is die kursusse afgesluit en die middag was al wat meisie is, besig om haarself vir die formele Buffet-ete in die Stadhuis reg te maak.

By die geleentheid is mnr. George van der Merwe, voorsitter van ASPU en redakteur van Die Afrikaanse Student as Meneer Kuesta aangewys en Juffrou Kuesta was niemand anders as die PUK se Salomé Jacobz nie. Die Wisseltrofee vir die kampus wat die beste gees deurgaans gehandhaaf het, is deur die Kovsies verower. Piet Strauss, president van die ASB het 'n boodskap oorgedra en die Kuestane moes stadigaan begin afskeid

neem.
In elke Kuestaan se hart het Antjie Krog se woorde gebrand:
„en aan die einde as alles verby is besef ek eers waarom dit gaan het
maar half hartseer in my sterkheid neem ek afskeid om êrens, vorentoe met dit wat ek ontvang het te begin.”

Kom flik vanaand saam met A.O.B.

ALBERT DE BEER is weer doenig soos dit vir ons lyk, en laas Vrydagaand se „Goodbye Mr Chips” het feitlik 'n vol saal getrek. Daar is nog klagtes oor onduidelike klank en krapperighede, maar steeds, in vergelyking met verlede jaar, het ons groot rede om A.O.B. lof toe te swaai.

Die sakboekie sê vir hierdie week, „Never give an inch” en ons het so 'n bietjie gaan lyk wat daar aangaan.
Name soos Paul Newman, Henry Fonda, Lee Remick en Michael Sarrazin interesseer natuurlik dadelik, en hierdie is

'n spanningsverhaal soos min. Dit speel af op 'n saagmeulbasis. Familiestryd, sabotasie en intrige is deel van Hank (Paul Newman) se krisis, en Henry Fonda lewer weer eens skitterende spel as Hank se vader, wat tradisie en sy werk

moet beskerm teen die agterdog van die dorpie. Lekker flik vanaand!

Oral is verder nog plakkate op van fliks soos „King of Kings”, en dan nog een van Louis Knobel se produksies,

„Die skat van Issie Delwerye”. Louis Knobel is verbonde aan die Pretoriase Kollege vir Gevorderde Tegniese Onderwys, en hy het tot dusver al 'n hele paar verdienstelike Afrikaanse rolprente, meesal dokumentêr, die lig laat sien.

.Vaar was alma.

'N APRILVAKANSIE is hopeloos te kort om aan akademie te bestee, 'n mens sal jouself net frustreer omdat jy nie alles gedoen kan kry nie, en natuurlik kan 'n mens nie huis toe gaan nie, want so 'n heen en weer gejaag versteur net die harmonie. Daarom vaar soveel Pukke op die avontuurjag uit, soos nou weer gebeur het.

Florna, Montium en al die ander is deel hiervan, maar daar het hierdie vakansie heelwat onoffisiële toere plaasgevind, en 'n mens verstom jou aan al die inisiatief. Die berugte Sewe Magnete van Klawerhof het byvoorbeeld die Kaap gaan oorneem. As 'n mens hulle uitvra, hoor jy van dinge soos die Sederbergpasuitklim, Kaappunt en Tafelberg, en dan is hulle nog uiters geheimsinnig oor 'n besoek aan die Hawekafee! Die wat hulle ken, sal weet dat hulle goeie ambassadeurs vir die Puk moes gewees het in hulle gewone sprinkel, en almal moet ook weet dat dit in hierdie tyd was dat Petro van der Merwe verloof geraak het!

Willemien Jerling en haar Botswanagroepie se wilde planne het effens natgereën, en alle brúe na die „gevaarlike” plekke toe het verspoel, maar uit hulle toerboekie kom tog dinge soos Kalaharinagte met springhaasjagte, leeus en blykbaar die reusagtigste muskiete wat 'n mens jou kan voorstel... In elk geval weet die meeste van dié dapperes nou iets van verf, plafonne en stemaak, want oom Dirk Jerling het toe al die teëspoede uitgebuut om die sendingplaas se huis leefbaar te maak! As 'n mens nou so luister na Tinus Joubert, klink dit of hierdie vakansie maar net die begin was van groot dinge...

Verder is Braam le Roux en Johan Ligthelm hier weg met rugsakke vol sjokolade en 'n plakkaat: „Pukke spaar Petrol”, op pad Wildekus toe vir 'n staptoer. Al wat 'n mens uit hulle kan kry, is dat dit definitief die moeite werd was, en hier en daar 'n staaltjie soos die keer toe hulle in 'n poel geswem het en die volgende oggend twee reuse luislange

ontdek wat klaarblyklik saamgeswem het!

Hulle lyk in elk geval nog heeltemal welgevoed en by hulle sinne.

Gerrit Coetzee en Quintus Pelser het 'n regte „bachelor's” vakansie gehad in die rustigheid van Oubos by die see! Die manne swyg soos die graf oor wat nou regtig daar aan-

gegaan het, sê net dat dit „goed” was...

Sarel Pretorius van Over de Voor en sy vriende het blykbaar dieselfde tipe ding in gedagte gehad met hulle Suidkusvakansie, en so sal daar nog vele ander dergelike geskiedenisies wees. Het iemand dalk gesê studente het nie meer planne nie?

ALABAMA

DIE Alabama-toergeselskap se toerprogram vir die komende vakansie vertel dat die klomp talentvolle Pukke in Suidwes-Afrika gaan toer.

Op pad na die mandaatgebied tree hulle ook by verskillende dorpe op en na die wintervakansie is hulle in Vanderbijlpark, Welkom, Potchefstroom en Klerksdorp te sien.

Die Puk-studente word gevra om die opvoerings in Klerksdorp ook te ondersteun omdat daar net vir vyf vertonings in Potchefstroom voorsiening gemaak is.

Die program begin met 'n programkeuring op Woensdag 26 Junie terwyl daar op 28 en 29 Junie aanbiedings in Carletonville plaasvind.

Die toergeselskap vertrek Sondag 30 Junie per trein uit Potchefstroom op hulle reis na Suidwes-Afrika. Die reis word onderbreek met opvoerings in Kimberley Maandag 1 Julie, De Aar Dinsdag 2 Julie en Upington Woensdag 3 Julie.

In Suidwes tree hulle Saterdag 6 Julie in Windhoek op;

Maandag en Dinsdag, 8 en 9 Julie, in Walvisbaai; Woensdag 10 Julie in Swakopmund; Vrydag 12 Julie in Otjiwarongo; Saterdag 13 Julie in Tsumeb en Woensdag 17 Julie in Gobabis. Die toer in Suidwes sluit met opvoerings op 18, 19 en 20 Julie in Windhoek af.

Na die aanvang van die tweede semester tree hulle van 25 tot 27 Julie in Vanderbijlpark op; 2 en 3 Augustus in Welkom en van 6 tot 10 Augustus kan die Pukke en Potchefstromers optrek om die Alabama in eie geleedere te sien optree. Hulle program word afgesluit met opvoerings van 15 tot 17 Augustus in Klerksdorp.

Alle Pukke wat op die verskillende plekke opvoerings bywoon word gevra om die Alabama mense na die optrede te gaan groet.

KOOP 'n LOOP-HAPPIE
HONGER ?
Probeer ons Vetkoek.

MAALVLEIS 25c.

KERRIE 25c.

KAAS en KONFYT 25c.

U het volop keuse in ons groot verskeidenheid

- HANDBOEKE
- SKRYFBEHOEFTES
- EN WAT U OOK AL VAN 'N BOEKHANDELAAR VERLANG

PRO REGE-PERS BEPERK

„Die Potchefstroomse Boekhandel”

TOMSTRAAT 86 — POTCHEFSTROOM

TEL. 5236

die WAPAD

TWEEDE KWARTAAL

DIE eerste vakansie van die jaar is iets van die verlede. Die tweede deel van die eerste semester met sy reusagtige akademiese berge is hier. Dit is nie net 'n kwartaal van akademie nie, maar 'n kwartaal waarin een van die hoogtepunte in 'n student se jaar plaasvind.

Karnaval wat vanaf 9 tot 11 Mei plaasvind sal vir baie 'n nuwe ondervinding wees. Dit is elke Puk se plig om met volle oorgawe aan Karnaval deel te neem. Onthou Karnaval sal wees wat u daarvan maak.

BYWONING

GEDURENDE hierdie kwartaal vind daar ongeveer elke Saterdag belangrike sportbyeenkomste plaas. Hier word onwillekeurig aan rugby gedink. Ons eerste span is tans die inter-universitêre kampioene en hulle werp alles in die stryd om hierdie jaar weer die kroon te dra. Een groot klagte is dat wedstryde wat in Potchefstroom gespeel word, baie swak ondersteun word. Dit is elke Puk se plig om die span, ons span te dra. Nie net is dit 'n Puk se plig om rugby tot kampioene te dra nie, maar elke sportsoort het ondersteuning nodig.

WAPAD-REDAKSIE

Hoofredakteur: Tjep van Schaik.
Assistent-hoofredakteur: Piet Ebersöhn.
Nuusredakteur: J. H. Habig (Thaba Jah).
Assistent: Jan van Niekerk (Dorp).
Redaktrise Sosiaal: Willemien Jerling (Klawerhof).
Assistent: Salome Jacobs (Dorp).
Redakteur Koshuise: Cobus Erasmus (Skuur).
Assistent: Dalene Delpert (Vergeet-my-nie).
Redakteur Akademies: Johan Pretorius (Skuur).
Assistent: Esme Wessels (Karlien).
Redaktrise Kunsblad: Belia Booyens (Dorp).
Redakteur Sport: Izak Malherbe (Liberalia).
Assistente: P. J. Meyer (Uitspan); A. F. Vosloo (Skuur).
Redaktrise Damesblad: Salome Brits (Oosterhof).
Redakteur Inter-Universitêr: Danie de Kock (Dorp).
Redakteur: P.N.B.: Quintus Pelser (Over de Voor).
Redaktrise Korps: Ineke Lindhout (Klawerhof).
Redakteur A.B.K.K.: George Lotter (Dorp).
Redakteur S.A.B.:
Fotoredakteur: J. F. D. Croeser (Uitspan).
Assistent: Sam Basch (Liberalia).
Sub-Redakteur: Attie Gerber (Liberalia).
Sekretaresse: Cecilia Louw (Wanda).
Sirkulasiebestuurder: Izak van der Linde (Over de Voor).

Sleep jy reg?

Geagte Redakteur,

Laat ek ook maar gou weer my stem laat hoor terwyl die onderwerp nog warm is. Dis verblydend dat so baie mense in die laaste tyd weer skryf en praat oor sleep en verhoudings, want dit wys vir my dat ek nie alleen só daarvoor voel nie. Ons Pukke is besig om die reeds beperkte omgang tussen mans en dames nog 'n verkeerde kleur ook te gee. My klag lê teen die wat so sleep dat hulle alle ander mense rondom hulle uitsluit, en dit bowendien vir die toeskouers redelik ongemaklik maak! 'n Mens trek gewoonlik suur teen tweetjies wat afpaar, maar miskien is radikale afparing wesenliker as hierdie toenemende afparing binne die groep!

Die liefde is pragtig, die liefde is 'n heerlike avontuur, en ek weet 'n mens se hêre wese is toegespits op die ander een, maar moet dan tog nie jou arme kamermaat saamsleep sêrkompetisie toe as jy daar gaan sit en koer in sy teenwoordigheid nie! En moet tog nie die mense agter se uitsig bederf deur julle intimiteite nie! As jy lief is vir Sannie, het jy nog altyd Koos, Willem en Rita se respek en kameeradschap nodig, en moet hulle dus nie afstoot nie.

Ek wil nie suur en verbitterd klink nie, maar ek plaas 'n vraagteken agter die soort liefde wat so intens blom dat dit net gaan om Jannie en Sannie alleen. Oppas vir te vinnig uitbrand en smaak verloor! Groetnis,

Teematweer.

BYLE EN BLOMME

GEAGTE REDAKTEUR, — Na aanleiding van 'n vroeëre brief deur my in die „Wapad”, beskuldig ene Meraai my in die uitgawe van 22.3.74 van veralgemening in my uitlatings.

Ek wil haar graag daaraan herinner dat haar geestesuster, Jeremina, in haar brief, waarop myne 'n reaksie is, ook nie lyne getrek het nie, ten spyte van die feit dat sy 'n minderheidsgroep verteenwoordig.

Daar is dus geen sin in om voort te gaan met die haar-klowery nie aangesien ons dit nie oor dieselfde groep dames het nie. Laat ons dus maar die strydbyl wegsit.

Wat die blomme betref is die rektor se tuin in elk geval veilig — dis te ver vir „een ou blommetjie”. Die tuine om die kampus sal die volle aanslag moet verduur. Het jy al daaraan gedink dat as die helfte van die sowat drieduisend dames op die Puk een aand per week sleep — en party sleep agt aande per week — die tuine 1500 blomme per week sal moet lewer? Sterkte aan die tuiniers — én die honde!

Buitendien onthef die feit dat niemand jou tronk toe sal stuur oor „een ou blommetjie” nie jou nog geensins van sekere etiese norme in die ver-

Hokkie-asters

DIE Puk se eerste dameshokkiespan het Potchefstroom-Dorp Saterdag redelik maklik met 3-1 gewen. Sanpat Coetzee en Isabel Buys het die Pukke se doele aangeteken.

In 'n wedstryd teen Goldfields het die tweede span met 2-1 gewen.

Karnaval '74 filmpremière



Richard Chamberlain en Frank Finlay in aksie in „The Three Musketeers”. (Foto 20th Century-Fox.)

SAB se reaksie verwelkom

GEAGTE REDAKTEUR, — Na aanleiding van mnr. Reynecke se brief in „Die Wapad” van verlede week, die volgende: Die toon wat u aanslaan in u brief lewer vir my duidelike bewys dat my vorige brief wel nodig was.

Verder moet ek u gelukwens met u fyn waarnemingsvermoë. Meeste van u afleidings was korrek.

Eerstens was ek wel die on-

dervoorsitter van een of ander vereniging en praat dus uit ondervinding. Ek bly ook eerder stil as om, byvoorbeeld, 'n puntuasieverandering in 'n voorstel ter tafel voor te stel, net om genotuleer te word. Ek glo in die volgende stukkie lewenswysheid — en meer mense kan dit gerus onthou: Van die baie mense wat niks te sê het nie, word niemand soveel waardeur as die wat dit in stilte doen nie.

Wat u tweede stelling betref: Is dit u EERLIKE mening dat daar iets uit die verslae van ander verenigings, soos wat dit op 'n S.A.B.-vergadering gelewer word, te leer is?

Ek was ook nie dikwels by die vergaderings nie omdat 'n mens in vandag se samelewing nie kan bekostig om tyd te mors nie, en S.A.B.-vergaderings op die huidige patroon, veral vir die ondervoorsitters, niks anders as tydmors is nie.

Vir die voorsitters mag dit miskien nog as 'n sport op die leer dien.

Het ek dit nie in my vorige brief duidelik genoeg gestel dat ek aanbeveel dat die een of twee sakies dat almal raak op 'n spesiale vergadering, waar al die betrokkenes teenwoordig is, behartig kan word nie.

Dankie vir die verwysing na die grondwet van die S.A.B. Mag ek u egter daaraan herinner dat papier geduldig is? In watter mate raak die S.A.B. die breë studentemassa werklik in die PRAKTYK? Ek dink u moes liever die „breë” uit u stelling gelaat het.

'n Laaste gedagte: Waarom „S.A.B.-Hoofbestuur”? Dit lê vir my na 'n stapelvorm. Staar S.A.B. dan nie reeds vir SENTRALE Akademiese BESTUUR nie?

WIL-NOG-HELP

Hit die Woord

En ek sê vir jou: Jy is Petrus, en op hierdie rots sal Ek My gemeente bou en die poorte van die doderyk sal dit nie oorweldig nie: Matth. 16 18.

'n Toekoms vir die kerk?

Die moderne mens sê: Nee!

Die Bybel sê: Ja! Die kerk se pad lê helder vorentoe; 'n reguit weg die toekoms in.

'n Triomferende Kerk! Waarom? Omdat hy stewig gegrond is en vasstaan. Hy is gebou om 'n stewige fondament; 'n harde onsluitbare rots. Die rots van die waarheid: U is die Christus! Hierdie belydenis wat Petrus namens die kerk doen word in die mond van die kerk geplaas. Met hierdie vaandel vaar die kerk deur die wêreldgeskiedenis; trotseer hy die storms van dwalinge en oorlogspyn. In die belydenis lê sy hoop op triomf!

'n Belydende kerk! Teenoor die grypande kloue van die hel, moet die kerk vas bly staan. Satan is magtig. Hy gebruik groot manne en magte vir sy doel — om die kerk ten gronde te rig; hom in sy fundamente te skud deur die belydenis te verpletter. Daarom: staan vas! Hou hoog die vaandel: U is die Christus!

'n Strydende kerk! Na die belydenis ontvang die kerk sleutels wat hy op sy tog moet hanteer. Die Woord en die tug. Op sy pad moet hy aktief wees. Hy moet regeer. Na binne deur die tug na binne en buite met die Woord. 'n Strydende kerk! Met die swaard van die Woord teen die gees van die tyd.

U is die Christus!

— My hoop op triomf

— My voortdurende belydenis

— My strydkreet!

U kan gerus u bande versool by...

**NATYRE
BANDAG**
(Edms.) Bpk.



'N VOLLEDIGE BANEDIENS ONDER EEN DAK
Groot Voorraad

- ★ NUWE en VERSOOLDE bande
Versoling nou ook verkrygbaar in die
GOODYEAR G 800 loopvlak
- ★ Nuutste toestel vir WIELSPORING en
-BALANSERING.

LOMBARDSTRAAT 37 — POTCHEFSTROOM
Skakel 3297 vir betroubare diens en laagste
pryse. —ST

VERGROTE BIBLIOTEEK IN GEBRUIK GENEEM

DIE uitbreidings aan die Ferdinand Postma-biblioteek van die Potchefstroomse Universiteit is voltooi en die vergrote gebou word op 26 April 1974 amptelik in gebruik geneem.

Die oorspronklike gebou wat in 1952 voltooi is, het ruimte gebied vir 'n versameling van 125 000 boekdele en studieruimte vir 150 persone. Tans het die gebou studieruimte vir ongeveer 1 200 persone en beskik dit oor 'n kapasiteit om 600 000 boekdele te huisves. Die huidige versameling bestaan uit ongeveer 350 000

boekdele.

Die gebou bestaan uit 'n kelder, die grondvlak en drie verdiepings. In die kelder word druk- en bindery gehuisves en materiaal geberg wat min gebruik word. Die grondvlak en die eerste twee verdiepings word beslaan deur biblioteekruimte wat vir gebruikers toeganklik is. Die derde verdie-

ping bestaan uit lesinglokalen. Wanneer dit nodig is, kan hierdie verdieping vir verdere uitbreiding van die Biblioteek gebruik word.

Om gerieflike studiefasiliteite vir gebruikers te voorsien, is die versameling so gerangskik dat die uitleenversameling en naslaanwerke vir elke vakgebied naasmekaar staan en dat verskillende leeskamers vir verwante vakgroepe gevorm word.

Voortrekkery

OP die onlangse Provinsiale Voortrekkerskongres gehou vanaf 28 tot 31 Maart te Pretoria, is daar deeglik kennis geneem van die Jukskei Staatmakers.

Te midde van baie probleme is ons die Donderdagmiddag na klas na Pretoria waar ons ywerig aan die besprekings deelgeneem het. Na afloop van die aand se verrigtinge het ons en die Staties van Tuks werk gemaak van die spreekwoordelike „twee koppe is beter as een.“

Om een vm. is daar uiteindelik eenstemming bereik en kon ons Pukke Potchwaarts keer om te „rus“ vir dit wat nog voorgelê het. Vrydagmiddag net na klas het ons Kombi sy neus in die nou al bekende rigting geswaai en was ons net betyds om die beskrywingspunt, deur ons ingestuur, in te lei.

Saterdag is die „langslewend-vroeg bed toe — gelukkig dié keer in Pretoria. Deur die verloop van die besprekings Saterdag is die „langslewendes“ wakker geskud deur die insig van die jeug, sodat daar aan die einde van die kongres spesiale vermelding gemaak is van die aandeel van die Staatmakers in die Kongres en ook 'n mosie van volle vertroue in hulle werksaamhede gestel.

Staties bo!

MATIE S.R. KOM KUIER

MAANDAG 1 April het die Studenteraad van die Stellenboschse Universiteit die Puk se Studenteraad besoek tydens hulle skakeltoer.

Die sake wat die meeste aandag geniet het was die verskillende verkiesingstelsels, so ook Karnaval. Dit is interessant dat Maties die dertien kandidate wat die meeste stemme op hulle trek op die Studenteraad dien. Die verskil tussen die verkiesingstelsel van die Puk en Maties kom daarop neer dat die Puk se Studenteraad 'n belangebeharting Studenteraad is en nie 'n verteenwoordigende Studenteraad is soos Maties nie.

Volgens Studenteraadslede was dit 'n baie leersame en interessante skakeling. Die samesprekings is op 'n gesellige wyse met 'n onthaal afgesluit.

Die Maties se Studenteraad het ook die Witsies en Tukkies se Studenteraad besoek.

INTREEREDE

DIE geskiedenis is dit wat deur die historikus as skeppende kunstenaar tot stand gebring word, het prof. G. N. van den Bergh in sy intreerede op Vrydagaand 19 April gesê.

Volgens prof. Van den Bergh het die historikus 'n dubbele taak: Hy moet die verlede ontdek en dit op 'n wetenskaplike wyse weergee. Sy menslike swakhede dra egter daartoe by dat hy slegs 'n „vergruisde“ beeld van die verlede kan bekom.

Omdat elke historikus sy eie siening van die geskiedenis het, kan daar 'n groot verskeidenheid vertolkings ontstaan. Dit staan bekend as relatiwiteit van die geskiedbeskousing. Relatiwiteit moet so ver as moontlik bekamp word deur objektiwiteit en kennis van die oorsake daarvan.

Prof. Van den Bergh stel as vernaamste oorsaak van relatiwiteit ons onvolmaakte en onvolledige kennis van die verlede. Ander oorsake is die historikus se persoonlike keuse van onderwerp en stof. Die skrywe van die werk self gee ook aanleiding tot relatiwiteit, omdat ingewikkelde gebeure vereenvoudig moet word ter

wille van verstaanbaarheid.

Die voordele van relatiwiteit lê daarin dat dit van geskiedenis 'n lewendende en polsende dissipline maak.

Die probleme van die historikus is menigvuldig: Hy is eerstens aan sy eie lewens- en wêreldbeskouing gebonde, waardeur sy geskiedvertolking dan ook gekleur word. Verder het hy ook 'n taak ten opsigte van sy eie tyd en gemeenskap; hy moet die verlede in 'n moderne en verstaanbare idioom weergee.

Volgens prof. Van den Bergh is die groot getalle werke oor die sedelike lewe van historiese persoonlikhede nie in die eerste plek wetenskaplik verantwoord nie, maar kan dit slegs beskou word as weerpieëlings van ons eie tyd se beheptheid met seks.

Prof. Van den Bergh het sy rede in die Konservatoriumsaal voor 'n groot aantal toehoorders gelewer.

Pasteibakke

MET die afgelope damesaand het ongeveer sestig pasteibakke verdwyn, waaronder vuurvaste bakke en vlekvrystaalbakke, wat alles heelwat kos. Die geld wat hiervoor geskuld word, word van mej. Jerling verwag. Daarby lei ons af, het sy nog verskeie ander finansiële probleme begin kry, sonder haar eie te doen. Die owerheid doen 'n beroep op die Puk-studente om mej. Jerling te kontak, terwyl sy nog op die Puk is, indien u enigiets weet van die pasteibakke.

Mej. Jerling sê dat sy die paar jaar op die Puk baie geniet het en is oortuig daarvan dat sy gestudeer het aan die puikste Wes-Transvaalse Universiteit in die land. Sy het heelwat oorspronklike idees omtrent sake soos ontspanning op die Puk, maar dit sal sy nou, weens haar huidige posisie, nie tot uitvoer kan bring nie. Sy sê dat sy baie jammer is omdat sy nie verder kan studeer nie. Mej. Jerling was 'n U.O.D.-student, maar sy proef nie eens op die oomblik nie, aangesien sy besef dat sy sonder twyfel sal moet gaan werk om haar skulde te betaal.

Die vertrek van mej. Wille-
* Vervolg op bladsy 6



deur my lens
reflektor

DIT is my tweede aflewering van my siening van sake op die Puk. Die vorige Reflektor mnr. Ben du Toit het sy dienstryperk voltooi. Ons dank aan hom vir sy siening en sy mening.

My aster by die kafeteria het toe weer daar opgedaag. Met die naderende winter het sy te pragtig gelyk in haar lang romp en rooi trui. Sy en haar vriendinne het in die kafeteria plaasgeneem, elk met 'n koppie koffie. Ek sit toe nader om te hoor wat sy en haar maters oor gesels. Tot my verbasing gesels hulle oor gesag en die invloed daarvan op die studente. (Darebly die dames kan oor iets anders gesels as klere, mans, grimmering, ens.) Hulle, dit is nou my kafeteria-aster en haar koffiegenote, begin toe om die gesag hier plaaslik te ontfel (arme gesag).

Dit is net hier waar soveel van ons foute maak. Gesag is van God en werk in 'n vertikale lyn van bo na onder. Hoeveel van ons glo dit andersom, met opmerkings soos: „Wie's hy, hy sal my tog nie skors nie“, „wie's die HK-lid, as hy nou met my raas, dan stem

ons nie weer vir hom nie, die Studenteraad beteken tog niks, ek doen tog wat ek wil“.

So gaan dit, so word lawaai oor lang hare, oor kleredrag, oor ontspanning, oor dit of dat.

Nou is dit so Pukke, dat as jy nie van die reëls of die gesag hier hou nie, is jy vry om hierdie plek te verlaat of om te buig en jou mond te hou. Maar moenie sekere mense en gesagsliggame afkraak met die muisagtige bravado nie. As 'n HK-lid konserwatief konsekwent die reëls uitvoer en sorg dra dat dit gedoen word, dan is hy 'n uitstaande leier. 'n Leier is nie altyd die lekker toe-oog-reëls-kêrel nie.

Daarom my aster by die kafeteria, jy weet mos van beter, jy ken mos die gesagbeskousing van die Puk, waarom opstandig, jy kan geen jota of tittel daarvan verander nie, en bowendien is dit nie so erg nie. 52—0 is veel erger! Reflektor.

Het u gekanselleer?

MNR. G. P. SCHOEMAN, registrateur (Akademies) vestig studente se aandag daarop dat hulle skriftelik moet kennis gee indien hulle kursus staak.

Klasgelde sal dan pro rata bereken word, die akademiese jaar op ongeveer 9 maande bereken. Indien persone nie skriftelik kennis gee nie kan dit gebeur dat die persone moet betaal vir klasse wat nie bygewoon is nie.

Die huisvader moet ook skriftelik in kennis gestel word indien koshuise verlaat word. Ook hier sal die losiesgeld pro rata bereken word. Hier is daar egter 'n bykomstige bepaling naamlik dat by die versuim van verlating, kan 'n boete opgelê word benewens gewone gelde wat betaal moet word. Die rede is hiervoor dat daar die koste voorberei word vir te veel persone, asook ander administratiewe ongerief.

Hierdie reël word nie so streng toegepas in verdienstelike gevalle van siekte of besering nie.

Pluimbal hou nog mooi

DIE Puk se tweede pluimbalspan het verlede Donderdag hul segetog voortgesit toe hulle Western Reefs met 12—9 geklop het. Die span is op die oomblik nog onoorwonne in die Wes-Transvaalse D-liga.

Die eerste span wat in die B-liga speel, het op dieselfde dag hul eerste neerlaag gely. Weermag het hulle met 12—4 geklop.

Die Spaanse Voorkoms!

Rompe met sorgvrye Spaanse voorkoms is hier! 'n Vol onderromp met drie valle beklemtoon die drievoudige swier!
Maak gou — wees in die mode!



Lang Spaanse romp
n et vol onderromp.
Slegs R13,99

Knie lengte
Spaanse romp
met vol onderromp.
Slegs R10,99

Fancy That!

TRUSTBANK -
DEURLOOP
POTCHEFSTROO

DIE KLEIN
WINKELTJIE
IN DIE HOEK

DRAKENSBERGE OORWIN

DRIE-EN-TWINTIG lede van die Montinum Bergklub het die afgelope April-vakansie 'n moeilike roete van 95 km oor die Drakensberge aangepak. Die klimtog van Mont-aux-Sources tot by Cathedral Peak was in ses dae voltooi.

Persoonlike uithouvermoë en fiksheid is tot op die uiterste beproef. Vir nuwe lede was die toer aanvanklik 'n nagmerrie.

Die toer het op Donderdag 6 April begin. Onkundigheid ten opsigte van rugsakverpakking, wat tot 27 kg geweeg het, het die vordering op die eerste dag vertraag. Net 11 kilometer kon die eerste dag afgelê word. Binne twee dae het die stappers egter hul voete gevind.

Die tweede dag moes 'n skof van 20 kilometer afgelê word om die toeristehut op die eskarp te bereik. Weens 'n hewige sneeuval was die kettingleer opgetrek en moes 'n helling van 70 grade uitgeklim word. Hierdie klimtog van 300 tree het drie uur geduur. Asemhalingsprobleme weens die dun lugdruk het vordering teen 'n slakkepas laat geskied.

Die stappers het op die derde dag 'n afstand van 30 km afgelê. Dit was die mees moordende en oninteressantste deel van die toer. Die groen veld was eentonig en sonder bome. Op 'n baie ongelyke terrein het die moeilike stappers die aand tent opgeslaan.

Die volgende dag het die elemente die stappers geteister. Reën, ysreën, mis en sneeu het die stappers se vordering bemoeilik. Middagete was in diep sneeu onder gehawende sambrele genuttig... Digte mis in die laataand het ver-

oorzaak dat die beplande afstand nie afgelê kon word nie. 'n Hewige ysreënstorm het die sopnat stappers mismoedig laat gaan slaap.

Die vyfde dag was die avontuurlikste en sal die langste deur die stappers onthou word. In stikdonkerte en digte mis moes 'n helling van 65 grade afgeklouter word. 'n Kosblik wat losgeraak het, het die stappers gewaarsku dat daar 'n afgrond naby was. 'n Los rugsak het ook klippe aan die rol gesit. Sommige van die stappers was getref en vir hul lewe aan graspolle vasgeklou. Sonder enige verdere voorvalle was die slaapplek, 'n oorhangende grot, met groot gejuig betrek.

Die sesde en laaste dag was met die aftog na die voet van Cathedral Peak begin. Briekbriek met tone wat seer in die stewels vaskop en knieë wat letterlik waterig word, het die moed van die stappers begin daal. Met die eindpunt in sig moes weer eens 'n helling van 70 grade afgeklouter word. Vir sommige was dit breekpunt. Soms wou die bene nie meer verder nie, en moes daar gepaai word. Seer en styf het van die stappers uit desperaathed die laaste paar tree gehardloop.

'n Koue bier in dorstige kele het die toer op 'n gepaste wyse afgesluit.

Die toer was in alle opsigte 'n sukses. Met Krummel se

kragpap as dryfkrag, het die stappers pligsgetrou in Bingo Kruger se voetspore gevolg. 'n Eenheidsgees wat gou onder die stappers ontstaan het, het telkens die stappers se aandag van hul ellende afgelei.

Gelukkig het die groep ook nooit verdwaal nie. Met ervaar bergklimmers soos Bingo, Oubaas en Danie in die groep

kon die stappers net mekaar se hakke volg.

Die dames verdien ook 'n pluimpie. Om oor sulke ruwe terrein rond te klouter, het van murg in die bloed getuig. Meer dames kan sulke toere onderneem. Vir die baie wat dit nodig het, sal so 'n uitstappie die onnodige vetrolletjies wegsmeel.



Beurend die steiltes uit met rugsakke wat die knieë knak.

Vere maak die voël

DIE VERE maak beslis die voël. Dit is die slotsom waartoe seker al die toeskouers tydens die Klee-volgens-jou-postuur-parade gekom het.

Die parade is geopen deur 'n demonstrasie van die mees algemene postuursprobleme by dames. Daarna het elf mannekyne van die Ann Botes Mannekyn- en Afrondingskool die nuutste modetreffers, waaronder ook twee trourokke, vertoon. Laasgenoemde het heelwat sugte van vervoering by die gehoor ontlok.

Nege Puk-asters het 'n sigbare bewys gelewer dat elke postuurprobleem met die regte kleding oorkom kan word. Mev. Botes het elkeen se probleem afsonderlik bespreek en die gehoor bedag gemaak op die klein bykomstighede wat die besondere probleem juis beklemtoon of verdoesel. 'n Dame met 'n holrug sal haar probleem beklemtoon deur byvoorbeeld 'n rok met 'n ingetrekke middel te dra. 'n Sagte, los rok, daarenteen, sal die holrug heeltemal onopvallend maak.

Die dame met 'n kort bolyf beklemtoon haar probleem deur 'n kort baadjie of 'n oortrektruitjie te dra. 'n Heuplengte baadjie sal baie eleganter vertoon.

Mev. Botes het herhaaldelik gedemonstreer dat noupasende klerde die aandag op elke postuurprobleempie vestig. Weinig dames kan dit met sukses dra. Los, vloeiende lyne, aan die ander kant, vlei so wel die skraal as die mollige figuur.

As nagereg het mev. Botes se mannekyne tabberds vir elke geleentheid vertoon. Broekpakke is steeds baie gewild, asook die tradisionele rok-en-jas ensemble. 'n Kaftan langrok is net die ding om die snerpande aanduggie in te trotseer. Die talle frilletjiesbloeses by rompe en langbroekpakke dui daarop dat vroulikheid in die mode nog lank nie aan die uitsterf is nie.

Die trourokke se snit en vleiende moue het veral indruk gemaak. Dit is die skeppings van Bettie en Jannie

Nortje van Klerksdorp.

In 'n onderhoud het mev. Botes gesê die roksome is hierdie winter beslis langer. Knielengte uitklokrompe, motorjakkies en baadjiepakke vang al die kalklig in die modetoneel. Woudgroen, bruin en alle skakerings van rooi en blou is die vernaamste modekleure vanjaar. Wat kledingstowwe betref, stap suiwer nuutwol en daardie ou staatmaker, Crimplene, los voor.

Mev. Botes het beklemtoon dat die mode onder geen omstandighede slaafs nagevolg moet word nie. Dit moet eerder 'n uitdaging vir elke dame wees om die mode suksesvol by haar eie postuur te laat aanpas.

Die aksie is deur Oosterhof, in samewerking met die Dameskomitee, aangebied.

* Vervolg van bladsy 5

mien Jerling uit die Puk-lewe en uit Potchefstroom beteken 'n groot verlies vir een en almal: vir die dosentekorps definitief 'n verlies, as 'n mens dink aan mej. Jerling se besondere vermoëns in die onderwys-rigting, veral waar dit gaan om nie-Blanke onderwys. Mej. Jerling was 'n baie aktiewe student op verskillende gebiede, waaronder Karnavalkomitee, A.O.B.-bestuur, K.V.V.-bestuur, te veel om op te noem.

Klawerhof sal hierdie student se oorspronklikheid op die Huiskomitee baie mis, en die dames van die Puk veral neem met groot spyt kennis van mej. Jerling se besluit. Sy het haar diensbaarheid oor en oor bewys met die geslaagde damesaand. Op 'n vraag waarom sy besluit het om die akademie op te skop vir die beroepslewe, het sy geantwoord: „Is dit nie maar geld wat ons almal dryf nie?” Daarop het ons uitgevind dat mej. Jerling haar akademie moet opse en gaan werk om groot skulde te delg.

THREE MUSKETEERS

KARNAVAL '74 se eerste aksie, naamlik die première van „The Three Musketeers”, is die groot voorloper van groot dinge. Dié flik het oral in Suid-Afrika uitstekende kritiek gekry, en daarom is dit die plig van elke Puk om volgende Donderdagaand (2 Mei) na die 20th Century-teater op te ruk.

Die film is gebaseer op Alexander Dumas se heerlike avontuurverhaal oor die drie vriende Athos, Aramis en Porthos, D'Artagnan, Charlton Heston speel die rol van die sluwe Kardinaal Richelieu, wie se planne om die koninklike familie te verneder, deur die drie musketiers gefnuik word.

Met name soos Raquel Welch (Mme. Bonancieux), Faye Dunaway (Milady) en Geraldine Chaplin (koningin Anne), is dit duidelik dat hier 'n prent gemaak is in die ou filmmakerstradisie om 'n „galaxy of stars” in te span. D'Artagnan is Michael York, en die drie musketiers is Oliver Reed, Richard Chamberlain en Frank Finlay. Voorwaar indrukwekkend!

Die meeste van ons onthou die storie soos wat ons dit in St. 8 in die vereenvoudigde weergawe gelees het, maar George MacDonald Fraser se puik draaiboek is gebaseer op die oorspronklike Dumas meesterstuk, wat 700 bladsye beslaan. Dit is dus 'n gesofistikeerde komedie in die egte

satiriese Dumas tradisie.

Interessant is dat, om die film so realisties moontlik te kry, groot dele geskiet is in er: hulle skreusnaakse helper, Toledo, in Spanje, omdat Toledo vandag nog 'n baie goeie weergawe van die 17e eeuse Parys is! Mense in daardie dae het selde gebad, die strate was vuil en misdaad het hoogty gevier. Al hierdie dinge is meesterlik uitgebeeld, en as 'n mens in ag neem dat die ganse verfilming net een jaar geduur het, is dit des te meer 'n pluimpie vir Regisseur Alexander Salkind.

Al die aksie en mengsel van romanse, satire, hartseer en realisme word briljant onderskryf deur die musiek van Michel Legrand.

Die première is 'n formele geleentheid, en kaartjies, R1,00 en 50c-plekke, is van Maandag 30 April af beskikbaar by die S.R.-kantoor. Aangesien daar nou reeds oraloer sprake is van geesvang vir Karnaval, word daar verwag dat hierdie 'n goed bygewoonde aksie gaan word, met 'n tipiese Pukspankel! Kom, ons sien mekaar almal daar...



Drie van die kunstenaars wat tydens Babara Ray (heel links) se optrede in die Totiussaal opgetree het. Elsa Havenga (middel) en die kleine juffrou Jones se puik sang het die gehoor in 'n regte stemming vir die hoofvertoning gebring.

Johan Malan (Edms.) Bpk.

VUURMAAKHOUT

OWENLAAN 2

en

GOEDERE ERF,
Potchefstroom Stasie.

TELEFOON 5371.

ONS LEWER AF

Posbus 69,
POTCHEFSTROOM.

—ST

GELUK IS . . .



'n
GESKENK
van

TALITA
TROUSSEAU
BOUTIQUE

TEL. 7303

SANTAM-DEURLOOP.

KLAWERHOF

SIEN julle dalk veertjies hier op die kampus rondfladder? Toemaar, dis nie iets bonatuurliks nie. Dis maar net die oorblyfsels van 'n kussinggeveg tussen Klawerhof se eerstejaars en tweedejaars. Die eerstejaars wil ook die tweedejaars bedank vir die verfrissende bad na die kussinggeveg — dis jammer dat die tweedejaars net so nat geword het.

O ja, Toekoms, soek julle dalk 'n geel en wit opvrou-skerm? Ons het besluit dit lyk gans te fyn en vrolik om in manskoshuis te staan — dit lyk veel meer van pas in ons koshuis. Ag toe nou, Toekoms, moenie vir ons kwaad wees nie. Ons moes iets in ruil kry vir daardie vreeslike stortbaddens, halfen in die oggend wat ons moes verduur.

Daar kom telkens klaagliedere en kermgeluide van die senior gange af — daar waar die seniors bly wat op die oomblik proefonderwys gee.

„Sulke ongedisiplineerde goed“, „die spul goed is erger as eerstejaars“ is klagtes wat gereeld oor die koshuis weerklank.

Geluk aan Petro van der Merwe, Roelien van Staden en Loraine van Rensburg met hulle verlowings.

Nou ja, tsiens en Klawer-groete tot volgende keer.

OVER DE VOOR

NA die langnaweek wat goedgunstelik aan ons toegestaan is, is die manne van Over-de-Voor terug vir die tweede kwartaal.

Die Taaibos-naweek was 'n reuse sukses en Over-de-Voor het met die louere weggeleef. Veels geluk aan die eerste rugbyspan vir hul oorwinning oor Taaibos.

Met karnaval wat op hande is, loop die gees noual hoog. Wat die ampsmotor betref, is die manne vasberade om die Chrysler huis toe te bring.

Op amoreuse vlak beweeg die manne elkeen op sy terrein voort. 'n Vraag aan Osie! Besef jy die verantwoordelikhede van jou stap? Sterkte Osie!

Leeugroete.

KARLIEN

NA 'n vakansie van uitpak en inpak is ons almal weer tuis, terug in Karlien, die fynste koshuis op die Puk.

Om terug te wees is heerlik en dis al asof daar in slaaptyd net so 'n ekstra blyheid om die hart vou. Wanneer die asters op die Kampus loop, weet 'n mens sommer wanneer 'n Karliendametjie modieus en vriendelik soos kome kan, by jou verby swiep.

Lena du Plessis, Christa Weber en 'n paar ander asters het intussen die kinderstaweltjies finaal uitgeskop, soos ons kan raai is daar groot feeste gehou met hul onderskeie mondigwordings, selfs Thalia se mense het in hierdie vreugde van Lena kom deel.

Karnaval is voor die deur — ons Eerstejaars gaan natuurlik die meeste Pukkies verkoop en Karlien se mooi debutante gaan die meeste geld insamel, daarom wens ons net die ander koshuise voorspoed toe in hul pogings.

Thaba Jäh

DIE manne van Thaba Jäh is almal weer terug na die kort vakansie, insluitende die uitlanders en die manne wat P.G.D. se naam hoog hou.

Op alle gebiede floreer die ouens weer. Dissie wat sy derde aanslag op Parys wil maak; die drie veterane wat al die stewels finaal opgehang het, het hulle weer van die rak afgehaal om hulle by die leutemmers te voeg.

Die dames van Kulu word hartlik bedank vir al die koffie en koekies wat hulle aan die sêrgroep verskaf het. Die sêrgroep het egter na die buitewyke gevlug. Dus, die dames wat die etensuur konserte geniet, kan maar gerus vir die ouens 'n koppie koffie saamneem. Die asters van Karlien moet hulle belofte na die laaste hokkiewedstryd onthou — ons wag in spanning.

Die slepery met Klawerhof vorder goed. Johan het ingeklim lank voor Karnaval, of is dit nou tradisie dat hy daar sleep?

Met die rugby gaan dit nog voor die wind. Saterdag 20 April het P.G.D. teen Strathvaal se derde span gewen met 31—9, die tweede span het teen Dawie Dup uitgedraf en hulle eindtelling was 32—6. Die derdes het egter met Dawie Dup se derdes weggehardloop om die eindtelling op 45—16 te staan te kom. As die klippe aanhou skaaf gaan daar nog groot dinge in Thaba Jäh gebeur.



Vergeet-ons-nie! So lyk Vergeet-my-nie se pragtige en unieke koshuise en die gimlaggende dames wat dit dra is maar 'n paar van ons oulike inwoners!

reeds besluit om 'n Kaartspeel Marathon aan te durf. Hulle beoog om tussen 50 en 60 ure te speel. Ons wil sommer nou al julle ondersteuning en belangstelling daarvoor vra. Van die manskoshuise sal dit hulle ook seker kan herinner dat daar nog onvoltooide veldslae van Karnaval 73 oorgebly het. Ons kan nie wag om ons boeke op te skuif en 'n fees van die Karnaval te maak nie. Ons bou vlot saam met Makouvlei en

Op Stalletjiesdag is Mike Botha en Frans van Aswegen aan die stuur van sake.

Sterkte aan die manne, die ander manne van Toekoms staan bankvas agter julle.

Maar tussen al hierdie dinge kry die manne darem nog kans vir rugby ook. Vra maar vir Skuur. Baie geluk aan die Eerste EN Derde spanne van Kompleks met die oorwinnings. Saterdag is dit 'n groot dag. KOMPLEKS vs. P.G.D. Dit be-

KASKENADES

HALLO, julle mooi goed, en hallo, al die meisies.

- 1) Na vyf jaar op die PUK, kan ek julle net sê: Rowers eis jul geld of jul lewe, vrouens eis albei.
- 2) Vrouens! Hulle is soos die wêreld:
Op twintig — soos Afrika: jonk en onontdek.
Op dertig — soos Asië: warm en eksoties.
Op veertig — soos Amerika: tegnies perfek.
Op vyftig — soos Europa: vol ruïnes.
Op sestig — soos Siberië, almal weet waar dit is, maar niemand wil soontoe gaan nie.
- 3) Daar is baie redes hoekom studente drink. Ek dink nou net aan een: as ons nie kan drink terwyl ons lewe nie, hoe de duiwel sal ons kan drink as ons dood is!

Groetnis, DIE OOG.

MAKOUVLEI

HIER in Makouvlei is al die manne weer terug met nuwe ywer en idees om die akademie te troef.

Die gees is dodelik reg, en kyk maar, karnaval gaan gróót dinge oplewer. Dis nie sommer verniet dat al die karnavalkomitee-ouens so 'n geheime-bende-vergadering, Mafiatipe van uitdrukking rondra nie.

O ja, Makouvlei het 'n nuwe inwoner gekry. Bietjie vraatsig en morsig en miskien later lawaaiig, maar darem tog so sag en donsigs en lief vir sprinkane. Dis natuurlik ons eie p.p.p. pragtige makoutjie wat seer sekerlik 'n staatsmaker van ndie koshuis gaan word. Vir almal wat bekommerd is oor die welvaart van so 'n klein diertjie tussen al die groot

HEIDE

HEIDE het nou wel nie soos soos Makouvlei 'n lewendige, vretende Makoutjie op hulle stoep nie, maar hulle het wel 'n ewe ronde en gesonde seekoeitjie op hulle nuut aangeskafde koshuise.

Die arme lydende Heidinne wat op ander plekke sleep, kan ook nou vir hulle geliefdes skryf op papier met die koshuisembleem op. So, mense as julle 'n klein seekoei met 'n lang pienk tong sien naderbeveeg, weet maar gewis (moe-nie lag nie!) hier kom Heide.

Heide laat nooit 'n geleentheid verbygaan om sosiaal te verkeer nie. Hierdie aksie word nie net aktief paarsgewys in die koshuis se sitkamer bedryf nie (soos tereg na verwys in 'n vorige Wapad), maar ook algemeen in die massa. Wanneer 'n inter gehou word, word dit ywerig bygewoon deur die meeste Heidinne en die manne geniet hulle gewoonlik gate uit.

Die groot geluk het Makouvlei ook getref om deur die asters van Heide getraakteer te word toe hulle vir 'n Paaseier-aand oorgenooi is. Omdat Makouvlei so uitstekend goed in Heide verteenwoordig word, was dit sommer vanuit die staanspoor 'n groot sukses. Die sterk, ervare manne van Makouvlei het al hulle inhibisies laat vaar en hulle volkome oorgegee aan die lekkerte van paaseier eet, soos laas toe hulle nog heel klein was.

Toe die manne ons veel later moeg en versadig verlaat het en hulle hulle ewe versadig in hulle kamers terugtrek, was die geweene gekners van tande groot as daar skuldige teruggedink word aan al die oortredinge. Maar wat! Wie gee om. Daar is net een maal in 'n jaar die geleentheid om 'n verskoning uit te dink om jouself oor te gee aan die vreugde van paaseiers!

KOSHUISKOS

KASTEEL

MET 'n uitputtende en genotvolle vakansie agter die rug, kry ons nou weer kans om bietjie asem te skep so tussen die akademie deur. Eintlik skep ons inwoners nie „vars“ asem hier nie, want die stof hang in so 'n wolk oor die koshuis soos hulle besig is om met donderende lawaal tuyn te maak. (so veronderstel ons, maar op die oomblik lyk dit meer na 'n rotsstorting.)

Ons het darem ook goeie nuus vir die mans wat hier sleep. Een van die mooi dae sal die stof van die tuine én die pad (daardie gaterige, klippe-ryge ongelykte waarop julle moet ry) gaan lê, want daar is vir ons 'n teerpas in die vooruitsig. As dit goed gaan sal dié groot gebeurtenis so teen die helfte van die jaar wees. Ons hoop net van harte dat ons nie so lank soos Skuur sal moet wag nie.

Kasteel kan met reg spog, want ons het vir die tweede agtereenvolgende jaar die meeste vir die Suiderkruisfonds ingesamel.

Ons het na die vakansie eers gedink dit is al lente, want of dit nie genoeg was dat Janette Kruger verloof geraak het nie, is ons prim getroude. Ons het reeds 'n nuwe prim, Marie Odendaal, en Louise Lombard is blok K se nuwe huiskomlid.

Sommer so tussendeur het ons netbalspan verlede naweek vir die Puk-liga gespeel en die wedstryd gewen.

Ons dink al sterk aan Karnaval en vier van ons dames het

ons hoop dat ons lekker saam met hulle gaan werk.

Kasteelgroete tot volgende keer.

TOEKOMS

DIS nie net die winter wat in aantog is nie. Saam met die tekens van die herfs kom ook die tekens van iets anders.

Soos byvoorbeeld om eenuur die nag onaangenaam gewek te word met 'n emmer yskoue water, afgelewer deur jou kamervenster. (Nie op bestelling nie.)

Ja-nee, Karnaval is in die lug. Ons vlotbou-maatjies, Klawerhof-suid, lyk besonder entoesiasies, nes ons. Vanjaar gaan Toekoms en Klawerhof voortbou op die suksesse van ander jare in die kompetisies, die vlotbou en al die ander dinge wat met karnaval gepaard gaan. Donderdagaand gaan ons en Klawerhof, 'n bietjie vooraf saam gesellig verkeer, net om die gees een honderd persent reg te kry.

As konvenors van die verskillende kompetisies is die volgende persone Maandagaand op 'n koshuisvergadering aangewys:

Kaap na Rio Wedvaart: Hannes van Wyk.
Fietsry: Kobus de Kock (H.N.P.).

Trapkar: Doppies Kotz, Andrew Fouche, Hennie Coetsee.

Aan die hoof van die Vlotbou is Chris Coetsee met Jan van Heerden as algemene Karnavalkonvenor.

loof 'n jong oorloggie te wees. Komaan dames van Klawerhof en ander dameskoshuise wat saam met Kompleks koshuise vlot bou, kom ondersteun die manne in massas.

SKUUR

IN die berig van Dorp word bevestig dat P.G.D. se tweedespan met 31—0 teen Skuur se tweedespan gewen het. Dit was toe nie ons tweedes nie, maar ons derdespan. Die tweedespan is na twee wedstryde nog onoorwonne. Die derdes was ongelukkig nie opgewasse teen P.G.D. II nie, maar speel elke dag stukke beter. Die vierdes kraai nog koning na die wedstryde teen Klooster en Dawie Dup. Geluk manne!

Baie geluk aan Kompleks, ons is bly om te hoor julle erken ook dit was geluk.

Die vooraansig van Skuur is nou voltooi, en as mens so na die manne se vaardigheid met verf en kwas lyk, sien jy sommer uit na Karnaval.

Groetnis aan ons vlotboueraars in Heide en Wag 'n Bietjie.

Ons nuwe eetsaal is voltooi, en dus gaan Skuur steeds van krag tot krag. Nou verkeer ons „vreetsaam“ eenkant en bly „dik“ vriende. Almal sien uit na die dag as ons gaan dak nat maak. Op dié gesellige noot, tsiens.

manne kan ons gerusstel.

Die eerste koshuisvergadering van die kwartaal is ook agter die rug en 'n groot probleem het opgeduik: Een van die manne wou graag weet of mens met 'n langsoenkompetisie jou valstande inlos of uithaal! Kan iemand nie dalk help nie? Indien wel, kontak ou „Dad“.

Namens die koshuis ook net twee gelukwensinge, naamlik aan Chris Hattingh wat verloof is en ook aan James Stoffberg, laas jaar se primarius wat nou Puk-eerstes se kaptein is. Hiermee gegroet aan almal en 'n vrolike lewe.

MOTOLEK

Hierdie onderdele is by u plaaslike

MOTOLEK

verspreider verkrygbaar



POTCH SPARES

Lombardstraat 39,

POTCHEFSTROOM.

Tel. 6077, 4595,

ELECTRICAL PARTS FOR JAPANESE CARS & TRUCKS.

motolek

—ST

sport

Gimnastiek kry spoed, hoogte

MET die Gimnastiekklub se eerste vertoning vanjaar tydens die amptelike opening van die Fanie du Toit-sportterrein op 23 Maart, was dit reeds duidelik dat daar nuwe fut in die Puk-gimnaste is.

Volgens die klub se nuwe af- rigter, mnr. Koos de Wet, kan gimnastiek binne die volgende twee jaar van die voorste sportsoorte op die Puk word. Hy sê dat die gimnaste se vor- dering „fenomenaal” is.

Hoewel die gimnastiekappa- raat van die Departement Lig- gaamlike Opvoedkunde nie op

standaard is wat betref die De- partement se aard en omvang nie, meen mnr. De Wet, 'n voormalige Springbok-gimna- stiekafrigter, dat die klub van- jaar besonder goed in kompe- tisies behoort te vaar.

Met die oog op 'n toer deur Rhodesië tydens die winterva- kansie vanjaar, word daar op die oomblik egter op vertoon- gimnastiek gekonsentreer.

Die toer sal uit 22 optredes bestaan. Dit sluit vertonings in vir die Rhodesiese Lugmag by Kariba en vir die Rhodesiese en Suid-Afrikaanse magte by die Victoria-waterval.

Die klub sal ook drie ver- tonings vir televisie-uitsendings lewer en agt afrigtingskursusse hou waar basiese beginsels en hulpverlening aan Rhodesiese gimnastiekafrigters gedemon- streer sal word.

Die doel van die toer is hoof- saaklik fondsinsameling, maar sal terselfdertyd dien as proef- skool vir 'n moontlike oorsese toer.

Wat kompetisie-gimnastiek betref, sal daar ná die toer op dié faset gekonsentreer word. Die klub sal vanjaar deelneem aan die Wes-Transvaalse Ope Kampioenskappe in Augustus en die Suid-Afrikaanse Kam- pioenskappe in September.

Tydens Intervarsity sal die gimnaste ook teen hul Kowsie- opponente in Bloemfontein meeding. Mnr. De Wet hoop om nog individuele reëlings te tref vir kompetisies met ander universiteite.

PUKKE NOG BABALAAS NA SPORTFEES...

NA DIE PUKKE se wegholoorwinning in hul eerste rugbywedstryd van die seisoen teen Allanridge, het die vyftien kêrels gedink dat hulle groot fees gaan vier met die inwyding van die Fanie du Toit-sportterrein op 23 Maart. Hulle het ook. Maar die S.A.U.-uitnodigingspan se skop van 32-20 was te kwaai vir hulle. Sedertdien kon hulle nie weer hul voete behoorlik vind nie. 'n Week later het Rustenburg hulle met 19-18 geknou.

Met die span se toer gedu- rende die Paasaweek deur Natal, het die teëspoed hulle ook gery. Die eerste wedstryd het hulle die Saterdag nael- skraap met 19-16 teen die Natalse Universiteit in Durban gewen. Paasmaandag het Tom- my Bedford en sy manne van Durban Collegians die Pukke lelik gepootjie in hulle twee- de en laaste wedstryd en hulle

teruggestuur huis toe met 'n yslike neerlaag van 52-0.

Ná die hoë noot waarop die Pukke verlede seisoen afgesluit het, is hierdie reeks neerlae en swak vertonings so vroeg in die seisoen seker die laaste wat enige Puk-ondersteuner verwag het.

Met die vorige pragseisoen agter die rug, bykans dieself- de span as verlede jaar en ook

die rugbyklub se beoogde oor- sese toer aan die einde van die jaar, sou 'n mens reken dat daar vanjaar geen keer aan die Pukke sou wees nie en dat 'n neerlaag absoluut 'n uitsondering sou wees.

Tot dusver hierdie seisoen was dit egter glad nie die ge-

val nie. Trouens, die teendeel is eerder waar. 'n Mens kan maar net hoop dat die sport- fees se gevolge nou uit die manne se lywe uit is en dat ons van nou af gaan sien hoe 'n ware kampioenspan prag- tige wenrugby speel.

...Maar oom Johan se swart koffie begin help

DIT is nie net die Puk-ondersteuners wat begin raad-op raak het oor hul span se reeks neerlae en swak vertonings nie, afrigter Johan Claassen se naels was ook al stomp gekou uit skone rade- loosheid.

Maar toe kom die beroemde afrigter verlede week met 'n skokkende, maar skitterende idee: „As julle Saterdag teen Strathvaal verloor, kan julle maar die oorsese toer op julle maag skrywe...”

Gemeen aan hul oorwinning van 24-13 het die Pukke se nuwe kaptein, James Stoffberg, en sy veertien man hierdie waarskuwing deeglik ter harte geneem. Maar op grond van hul patroonlose spel kan nie dieselfde gesê word nie.

Van die begin af het dit suk- kel gegaan en dit het gelyk of daar nog 'n pak slaag op die Pukke wag. Strathvaal het die wedstryd selfs tot ná half tyd gedikteer voordat James-hulle uiteindelik die oorhand kon kry.

Vroeg in die wedstryd het Paul du Rand, Strathvaal se heelagter, met 'n strafskop ge- slaag om sy span 3-0 te laat voorloop. Maar die telbord het skaars gaan stilstaan, toe maak heelagter Willie de Bruin die telling gelykop met 'n straf- doel.

Hierna het Japie Britz, ha- ker van Strathvaal, gaan druk. Du Rand kon nie met die ver- vyfskop slaag nie.

Willie de Bruin het die laas- te punte van die eerste helfte

aangeteken met 'n strafdoel vir die Pukke. Dit het die rus- tydtelling op 7-6 in Strath- vaal se guns te staan gebring.

Toe daar ná rustyd metter- tyd meer patroon in die stu- dente se spel gekom het, was dit skrumskakel Theuns van Rensburg wat oorgegaan het vir 'n drie. De Bruin het met die verryfskop geslaag. Hier- na het hy die Pukke se voor- sprong na 15-7 opgejaag met 'n strafskop.

Die Geeltruie wou net begin slap lê, toe bars skrumskakel Ivan du Plooy oor hul doellyn vir 'n drie. Du Rand het weer vervyf en Strathvaal se agter- stand na 13-15 laat krimp. Eric le Roux, wat uitstekende kantmanspel gelewer het, het egter Strathvaal se hertoe- trede tot die wedstryd gestuit me 'n mooi drie. De Bruin se voet was weer in die kol. Oom- blikke voor die einde het los- skakel Schalk van der Merwe die doodskis finaal met 'n skepskop toegespyker. Die eind- telling was 24-13.

Vroeër die middag het die P.U. o.20 B-span hul Strath- vaal-opponente met 20-17 ge- klop. Die Puk se derde span onder leiding van Jim van Rensburg, wat deesdae haker speel, het Strathvaal III met 29-18 getroef.



Twee rugbymanne op wie daar vanjaar 'n groot taak wag, is mnr. Johan Claassen (links) en James Stoffberg (bo). As die Pukke se nuwe kaptein sal Stoffberg moet sorg dat sy span nie vanjaar hul bekende afrigter se naam skade aan- doen nie. Mnr. Claassen is die man wat die Pukke uit hul lui- dige swak posisie sal moet red.



Die nuwe Fanie du Toit-sportterrein is iets waaroor besoekers nie uitgepraat kan raak as hulle dit vir die eerste keer sien nie. Hier beraadslaag die twee hoofdoenars van die Sportinstituut, mnr. Piet Brand (links) en mnr. Piet Brand, die sportdirekteur, tydens 'n geselligheid met die amptelike opening van die terrein.

Pikkewyn, Marleen onttron Elmo, Rihetta

DIE grootste verrassing op die Puk se tenniskam- pioenskappe wat op 30 Maart ten einde geloop het, was Rihetta van Heerden, verlede jaar se enkel- kampioene, se neerlaag in die halfeindronde teen Annemarie Slabbert.

In die eindstryd het Slabbert egter teenspoed gekry. Marleen Lombaard het haar met puik tennis onder die net ingespeel om die damesenkelspeltitel te buit.

Pikkewyn Malan het ook re- delik maklik met Elmo Fer- reira, die gewese kampioen, afgereken. Die telling was 7-5, 6-4. Malan was die gunste- ling om die titel te wen. Ferreira en Pieter Campher

was die enigste wat hul titel kon behou deur vir Fanie Campher en Derek Botha in die eindstryd om die mans- dubbelspeltitel te klop.

In die damesdubbelspel is daar ook nuwe kampioene ge- kroon. Hulle is Mades van De- venter en Rienie van Rensburg wat vir Marleen Lombaard en Rihetta van Heerden van hul titel beroof het.

DIE KINGS HOTEL

KONDIG MET GENOEE AAN DAT HULLE NOU ONDER NUWE BESTUUR IS.

—★—

ONS BIED:

- Copper Rail Restaurant en Dameskroeg
- Studentekroeg
- A la Carte Restaurant
- Musiek deur die 'Quick- sands' van Johannesburg

ONS IS TEN VOLLE GELISENSIEER

—ST

Safari SPORT EDMS. BPK

DIE KAMPIOENMAKERS

Santam-Arkade
Tel: 7673
POTCHEFSTROOM